

中國醫學源流論

中華民國二十四年夏

謝利恒先生全書

陳研因題

謝利恆先生傳

同邑呂思勉撰

君武進謝氏。名觀。字利恆。世居縣西北之羅墅灣。羅墅灣濱孟河。孟河號多名醫。君祖葆初先生其一也。父鍾英先生。精輿地之學。工古文辭。爲世名儒。君少承家學。性又穎悟。年十二。畢五經四子書。於古今山川形勢。郡邑沿革。已瞭如指掌。又熟誦內難經傷寒雜病論集本草經方。年十五。出就外傅。益肆力於史學輿地。精研史漢諸子。爲文章。不懈而及於古。時直甲午戰後。海內爭言維新。邑故有龍城書院。課應舉之文。及是。改爲致用精舍。肄經史輿地之學。君與焉。試輒冠其曹。年二十一。肄業於蘇州東吳大學。以丁外艱廢。光緒乙巳。始以地理之學。教授於廣州中學。已而兩廣優級師範。游學豫備科。陸軍中學。廣東法政。初

級師範。陸軍小學。隨宦學堂。聞君名。爭相延致。君口講指畫。學生咸欣然。自以爲有所得。一時廣州地理教席。非君無以厭衆望。君以任課太繁。又母夫人不服嶺南水土。居三年。辭歸。爲上海商務印書館編纂地理書籍。時澄衷學堂經費充裕。爲海上私校冠。而辦理未善。風潮時起。歲戊申。董校事者延君主焉。君至則嚴管理。勤教課。澄衷學則遂爲諸校首屈。國體旣革。武進人推屠君寄主縣政。以君鄉里碩望。延掌本縣教育事。君悉心擘畫。嚴考績。圖擴充。居二年而去。其始至也。學校三十。學生四千。其去也。學校百五十有八。學生六萬數千人。教育部第全國二千縣成績。武進次二。袁總統召君入都。欲使長省教育廳。君豫燭洪憲之變。不欲仕。辭焉。民國二年。仍入商務印書館。主纂

地理書籍。先後成圖書三十餘種。君以爲一統志暨各省郡縣圖經。多詳於古蹟風景。若行事。而於地形地質氣候風俗物產。罕能道其詳。失地學真意。闕經世之用。銳意欲纂各省新志。未果。而治中國醫學者。謀編辭典。以詗商務印書館。商務印書館以屬君。君於醫。雖不以是爲業。顧自幼熟誦醫經。經方。長而瀏覽弗輟。親故有疾。或爲治療。遇儒醫世醫。若草澤鈴醫。有一技之長者。必殷懃詢訪討論。未嘗一日廢也。及受諉託。卽欣然自任。縱覽古今醫籍。旁及朝鮮日本之書。汰其蕪。去其復。存其精英。歷時八年。成書二百五十萬言。而君鬚髮白矣。乃謝商務印書館。寓上海。名其室曰澄齋。以其技救人疾苦。又出其所心得。以詔後生。有志醫學者。踵至。初。上海醫家設中醫專門學校於

城中延君長其校。君爲定課程。編講義。時在民國六年。實爲我國中醫學校之首創。海內繼起者。咸取則焉。十四年。神州醫學總會設中醫大學於開北。又延君長其校。將以研究高深學理。爲全國醫學升階。凡數年。以時局不靖。中輟。海上醫學團體多。而意見不一。君謀所以和會之。十八年。乃發起中醫協會。適中央衛生委員會通過廢止中醫案。中醫協會宣言否認。而召集全國醫藥團體代表大會。三月十七日開會。至者十有五省。醫藥團體百三十有二。出席代表二百六十有二人。提案百餘。成立全國醫藥團體聯合會。其後遂以三月十七爲國醫節焉。會既終。推君爲代表。入都請願。廢止中醫之案。由是得免施行。其秋。衛生署及教育部。又頒中醫學校名稱及管理藥商規則。於

本國醫藥業大爲不便。十二月又召集第二次全國醫藥代表大會。至者十有七省。團體二百二十有三。出席代表四百五十有七人。君見推爲主席暨常務委員。始正中醫中藥之名曰國醫國藥。會既終。再推代表入都。蔣主席善之。命撤消所布規則。中國醫藥始得無所束縛。二十年中醫協會改組爲上海市國醫公會。歷次大會。君仍見推爲主席暨監察主席。是歲中央國醫館成立。又見推爲常務理事。二十二年。上海市國醫分館成立。君見推爲常務董事。二十四年。中央國醫館改選。君仍任理事。上海市衛生局試驗登記中醫者七。君五爲試驗委員。蓋自民國六年以來。君於國醫公務。靡役不從。亦云瘁矣。是歲君年五十有六。國醫節後。乃謝世務。居澄齋不復出。但日爲弟子討

論學術。而君弟子羣謀輯君言論行事。以告當世。曰中國醫學源流論。曰中國醫話。曰中國藥話。曰澄齋醫案。曰澄齋驗方。曰澄齋雜著。曰澄齋年譜。附以葆初先生醫集。鍾英先生文集。凡如干卷。將次第刊行。而訟言曰。君潛心醫學四十年。盡力醫事。餘二十年。問學弟子。無慮數千人。朝鮮日本台灣暹羅南洋羣島坎拿大。凡華人足跡所至。無不耳君說。誥書與君相討論者。學說傳布之廣。近古以來。未之有也。其嘗問業於君者。學輒有心得。取君說以治病者。輒有驗。蓋君於醫學理法。研之至精。而於新知融會貫通。無所隔闕。故能深探疾病之原。而參酌乎風土人情。以爲變化。是以放之寒溫熱三帶。而皆準也。聞者以爲信。

呂思勉曰。君真振奇人哉。予識君時。年未弱冠。今逾三十。



年矣。予頗讀古書。喜事考證。自度無以逾於君。於醫學則一無所知。顧君不以爲無所知。讀古醫書。或時下問。相與賞奇析疑。其以能問於不能。以多問於寡如此。泰山不讓土壤。故能成其高。河海不擇細流。故能成其大。君所就之遠。固有由矣。世之知君者。以輿地醫藥之學及古文辭。顧君之所長。初不止此。予嘗與君上下其論議。君於千載以前。湮沈晦塞之事。洞見其所由。若燭照而數計。其於當世之事。剖析其得失。而逆測其遷流之所屆。著蔡弗能逮也。君真振奇人哉。而僅以輿地醫藥古文辭鳴。時爲之乎。而豈君之志哉。

中華民國二十四年四月一日

謝利恆先生全書先後校訂門人姓名名錄

金致和

江蘇武進

倪國楨

江蘇上海

周康賢

江蘇上海

張贊臣

江蘇武進

倪國鑫

江蘇上海

陳柏春

廣東潮陽

周建猷

福建安溪

蔣去病

江西九江

陸如柏

江蘇崇明

項承先

浙江龍游

張蘭庵

浙江鎮海

汪子良

浙江海甯

蕭仲有

浙江蕭山

徐宗瑾

浙江海甯

郭雲蟾

江蘇上海

王林芳

江蘇武進

朱滋源

浙江海甯

徐西涼

江蘇上海

程文之

江蘇武進

張旭初

江蘇武進

支啓洪

江蘇崑山

董漢勤

江蘇吳縣

黃秉亮

江蘇上海

馬繼成

江蘇武進

任伯英

江蘇宜興

朱懷志

浙江慈溪

何思仁

江蘇武進

陳淑華

廣東新安

趙本道

江蘇上海

王公度

江蘇武進

伍浦生

廣東廣州

沈育良

江蘇上海

楊學交

江蘇武進

周國光

福建閩侯

謝秋生

江蘇上海

姚兆培

江蘇嘉定

周國年

江蘇上海

沈秉俠

江蘇寶山

張星

江蘇川沙

江天福

福建詔安

謝佩珍

浙江餘姚

崔源清

浙江鎮海

徐渭江

江蘇青浦

李萬春

浙江臨海

袁靜庵

浙江新登

陸克成

江蘇宜興

韓崧靈

江西廣豐

潘超羣

江西九江

費惠民

江蘇無錫

秦國秉

江蘇上海

吳漢雲

江蘇吳縣

何雷伸

浙江杭縣

張義正

江蘇江陰

吳湘珠

江蘇吳縣

葉曉雲

江蘇上海

鍾益棠

浙江鎮海

楊克強

江蘇青浦

馮仲謀

江蘇武進

張志恆

浙江臨海

朱春林

江蘇武進

賴震東

江西南昌

龔昌柄

江蘇上海

王警愚

安徽定遠

韓妙學

廣東廣州

萬濟民

江西南昌

孫次書

安徽泗縣

陳覺民

廣東台山

凌世昌

江蘇南匯

林達生

廣東台山

夏畹九

江蘇南匯

張懋森

廣東東莞

程三溪

台灣

高肇基

江蘇嘉定

曹半帆

江蘇江陰

鄧耀申

廣東三水

李玉盛

廣東梅縣

孟月良

江蘇無錫

單吉平

江蘇武進

楊濟平

廣東大埔

周仲賢

江蘇上海

沈融

江蘇上海

姚士奇

江蘇松江

方倜羣

江蘇南匯

錢堯熙

江蘇上海

黃克歐

江蘇崇明

張福康

江蘇武進

張師永

江蘇青浦

沈祖昌

江蘇崇明

曹省三

江蘇上海

韓成烈

福建漳州

陳祖繩

江蘇海門

馬福康

江蘇松江

倪維德

安徽歙縣

劉正平

江蘇江陰

蔡健人

江蘇上海

于筱芳

江蘇武進

徐允逸

江西吉水

史德孚

江蘇海門

李郁峻

江蘇松江

中國醫學源流論序言

武進謝利恆先生於編輯中國醫學大辭典後復著中國醫學源流論取數千年來各家學說上起炎黃下迄近世考其源流別其枝派原原本本若網在綱啓後學之津梁樹醫林之楷範脫稿業經十載曾於國醫公報醫界春秋刊布海內醫家嘆爲絕作近日及門諸子爲先生編印全集復以此篇冠其首而命序于伯未伯未昔肄業於中醫專門學校先生方任校長旣聞至論敢述要語弁諸簡端先生之言曰古今中醫書籍幾於汗牛充棟非抄襲舊說卽標榜攻訐其能發明新理者不過什之一二要其大體後者勝前但古書言簡而該後世言複而雜學者宜取其治病之效不必拘於成見致滋聚訟凡聚訟之端不外溫

涼攻補推其故。有因乎水土氣候不齊者。有因乎治亂安危環境者。我國疆域廣大。川原交錯。氣候備寒溫熱三帶。而人事之遷變尤蕃。故凡華文所布之區。卽中醫所達之處。若執一隅之見。以概萬有不齊之病。安能適當。是以歷史地理生物自然社會諸科學。攻醫者皆必須略涉藩籬。方能會其通而觀其變。而得醫術之大全。此屬於藝者也。醫者固以藝術爲職志。然昔人常以爲應與修養道德共同砥礪。故素問上古天真論等數篇。古聖首懸爲教。吾人業醫者。應如何懲忿窒慾。以養肝腎之陰。行矩言規。以固榮衛之氣。甯靜澹泊。以葆固有之靈明。勤動四肢。以和周身之血脈。合修身養性爲一途。成已利人爲一事。昔傅青主之艱貞肥遯。徐洄溪之勵志潛修。實能得先聖心傳。而

年壽亦與之俱永。固非獨其技之足高。抑亦其行之當法也。先生之言如此。夫長江之源。發於犁石。東會岷沱。出三峽。下洞庭。浩浩湯湯。千里一瀉。其利物之溥。亦猶我中華醫學。肇自皇古。衍於後世。所療治者。不知其幾億兆人也。然以其源遠而流廣。泥沙土石。不能無所雜。則泛濫橫流。遂或不免。是猶今日醫說之紛歧。生於其心。害於其事。而病者遂受其敝也。得先生之言以示之。庶幾沿流溯原。集衆說之長。而去其偏蔽。使中醫學說益臻昌明。世界人類咸受其福。仁言利溥。其垂遠矣。先生豐頤廣額。美鬚髯。衣大布之衣。真率敦樸。精神朗靜。其立言也。不阿世。不立異。不掩同體之善。不忘異派之美。精微廣大。兼而有之。是則讀其書者皆能知之。固無俟咕咕也。

中華民國二十四年元旦弟子秦伯未謹序。



中國醫學源流論目次

醫學大綱

儒學比例

醫學變遷

上古醫派

素問攷證

難經攷證

靈樞經攷證

神農本草經攷證

傷寒雜病論攷證

金匱要略攷證

古代脈經